

## 2 Corintios

### *Õpa gojabeõnumi Pablo Corinto majarãre*

<sup>1</sup> Yũhũ Pablo Jesucristo yare ãgũ buhedore ãgũ apidigũ ãhraa. Mari Pagũ ãgũ gamero dopa ta apimi yũre Jesu. Yũhũ, mari acaweregũ Timoteo mera mũare Goãmũre umupearãre Corinto majarãre gojabeoa. Árĩpehrerã Jesucristo yarãre Acaya majarãre mũa sãre gojabeoa. <sup>2</sup> Eropirã Goãmũ mari Pagũ, mari Opũ Jesucristo mera mũare õadoreo. ãgũ itamuro mera õaro árĩque mũa.

### *Pablo ãgũ ñero tarirare õpa arĩ wereñumi*

<sup>3</sup> Mari Opũ Jesucristo Pagũ Goãmũ marire mojomoro ãhami. Eropigũ ãgũ dihta marire árĩpehrerinũri õaro siporãcũcũ iimi. “Õatariagũ ãhrimi ãgũ,” arãa mari. <sup>4</sup> Mari ñero taricũ ãagũ marire ãgũ yarãre itamumi ãgũ gajirãre mari itamuboro dopa. Eropirã gajirã erã ñero taricũ erãpũre itamuro gahmea marire. Goãmũ marire ãgũ itamuro dopa ta mari sã erãre itamurã. <sup>5</sup> Cristo yarã mari árĩrã ãgũ ñero taridiro dopa ta mari sã bũrigã ñero taria. Mari ñero taridiro dopa ta ãgũ itamurire wũaro opaa. <sup>6</sup> Gũapũ mũare itamurã ñero taria. Eropirã Cristo mera mũa õaro árĩbõro dopa gũa mũare werera dipuwaja gajirã ñero iima gũare. Gũa ñero tariquerẽcũ Cristo gũare itamumi. Eropirã Cristo gũare itamucũ gũapũ mũa sãre itamumasia. Eropirã gũa ñero taridiro dopa ta

mua sã ñero tarirã òaro mera yujuro bojerãca. 7 Òaro mera mua yujuro bojerã áríborore gua masia. Gua ñero taridiro dopa ta ñero taria mua sã. Eropirã Goãmũ ìgũ itamuri mera gua yujuro bojediro dopa ta mua sã yujuro bojerãca.

8 Gua acawererã, dohpaguere ire mua òaro masicũ gua gahmea. Asia yebaguere ñetariaro taribũ gua. Gua gamero iirã ne bocatĩubiriboya. Òpa arĩ pepiribũ gua: “Ne bocatĩusome mari. Eropirã mari sírirãca,” arĩ pepiribũ gua. 9 Eropirã “Marire wejêcãrãcoma,” arĩ pepiribũ gua. Gua eropa ñero taribũ Goãmũ dihtare gua guñaturaboro dopa. Ìgũpũ sīrinirãre masugũ àhrimi. Eropa ìgũre guñaturarã gua gamero gua bocatĩubirirare masia. “Goãmũ ta marire itamumi,” arãa pare. 10-11 Gũare gũhyaquerecũ ta ìgũ itamuro mera taribũ. Pũhrũgue sãre dipaturi gũare taugũcumi. Mua sã gũare itamumorã mua Goãmũre serêbasacũ sãre ìagũ ìgũ gũare taugũcumi. “Ìgũ ta gũare taugũcumi,” arĩ masia mari. Eropirã ìgũ gũare taucũ ìarã, ìgũre “Òhaa” arĩrãca mũapũ. Mua bajarã serêrere ìgũ yũhricũ ìarã “Òhaa, diaye ta àhraa,” arĩrãca mua bajarã Goãmũre.

*Pablo Corintogue ìgũ wadiarare wereñumi*

12 Eropirã gua iirare guñarã mucubiriri mera òpa arĩ pepia gua: I yebare Goãmũ ìgũ itamuro mera ñeri mariro òari mera masare wapicũ buhebũ. Mua sãre òaro wapicũ buhebũ. Òpa iirã gua masiri mera iibiribũ. Goãmũ gũare ìgũ mahicũ ìgũ turari mera eropa iibũ gua.

13-14 Eropirã ðaro were mware gojabeorã diaye ta werebu mware ðaro mua masiburire. Dohpague guare ðaro masinibea mua. Gua arĩricurire mua turaro masicũ gahmea gua. Eropirã mari Opũ Jesucristo dujaricũ gua mera mucubirirãca mua. Mua mera gua mucubiridiro dopa ta mua sã gua mera mucubirirãca.

15-16 Eropa arĩ pepigũ Macedonia yebague wagũ mua pohrogue wamũhtadiarabu. Eropigũ mware ihatariwahgãboya. Eropigũ erogue ejadigũ dujarigũ dipaturi mua mera bajamenurigã arĩboya yũhũ. Eropirã pesubu mua mera yũ arĩcũ ãarã turaro mucubiriboya mua. Mua pohrogue yũ arĩcũ ãanirã Judea yebague yũ wacũ ãarã yure itamuboya mua. 17 “Wagura,” yũ arĩcũ peenirã arĩrã, yũ wabiricũ ãarã “Pablo Jesure umupeobirã iro dopa guyagu iĩñumi,” ¿arĩ pepiri mua? “‘Wagura,’ arĩqueregu ãgu gamero mari pohro aridiabiriñumi ãgu,” ¿arĩ pepiri mua yure? “ãgu arĩdiro dopa iibeami,” ¿arĩ pepiri mua? 18 Eropa arĩ guyagu iibeaa yũhũ. Eropigũ “igura,” arĩgu yũ arĩdiro dopa ta diaye ta iiaa yũhũ. Irire masimi Goãmũ. 19 Yũhũ, Sila, Timoteo mera Jesucristo Goãmũ magũ yare mware werebu. ãgu Jesucristo “igura,” arĩgu, diaye ta iigu ãhrimi. Goãmũ ãgu arĩdiro dopa ta Cristo iimi. 20 Arĩpehreri ãgu Pagũ ãgu masare “Õpa ðaro igura,” arĩ wererare Cristo iipehocãdi arĩmi. ãgu eropa iigu arĩcũ gua ãgu yare gajirãre werea Goãmure erã umupeoboro dopa. 21 Cristo yarã marire arĩniguicũ iigu Goãmũ ta ãhrimi. Eropigũ ãgu yare weremorãre marire apimi ãgu.

<sup>22</sup> Eropigu ĩgu yarã mari árĩcũ ĩagu irire marire masicũ iimi ĩgu. Eropigu ĩgu Espĩritu Santore mari mera árĩdoremi ĩgu. Mari mera árĩcũ ĩha Goãmũ ĩgu marire ðaro iiburire masia mari.

<sup>23</sup> Dohpaguere yũhũ mũa pohro wabirirare diaye ta weregũra mũaare. Yũ wereri diaye árĩcũ Goãmũ masimi. ĩgu ta yũ pepirire masimi. Mũa ñero iira dipuwaja turidiabigu mũa pohroguere wadiabiribũ. Erãre bũjawerecũ iiri, arĩgu mũa pohroguere Corintoguere wabiribũ. <sup>24</sup> Eropirã “Mũaare dorerã ãhraa gũa,” arĩrã iibea. Eropirã “Õpa Cristore umupeoro gahmea mũaare,” arĩrã iibea gũa. Mũa Cristore ðaro umupeotuhabũ. Mũaare umupeonemocũ iirã mũa ðaro mucubirirã árĩcũ iidiaca gũa.

## 2

<sup>1</sup> Wabigu ðpa arĩ pepibũ: “Dipaturi erãre bũjawerecũ iidiabea. Eropigu dohpaguere wabea,” arĩ pepibũ. <sup>2</sup> Mũaare bũjawerecũ iidiabea. Mũa bũjawerecũ ĩagu yũrũ mucubiribiriboya. Eropirã yũre mucubiricũ iimorã árĩbiriboya mũa sã. <sup>3</sup> Eropigu mũa pohroguere wabiribũ. Wabigu mũa árĩricũre amuboro dopa mũaare gojabeobũ. Mũa yũre mucubiricũ iibonirã árĩquererã ta yũre bũjawerecũ iiboya mũa mũa pohroguere yũ wacũ. Mũa mera yũ mucubiricũ mũa sã yũ mera mucubirirãca. Irire masia yũhũ. Eropigu mũa mera bũjaverediabigu “Wabea,” arĩ, carta gojabeobũ. <sup>4</sup> Eropigu mũaare gojagu wũaro pepigu ñero sĩporãcũgu, turaro co deco wiriri

mera mware gojabeobu. Eropa gojagu mware bujawerecũ iidiabiribu. Mware yu buringã mahirare mware masicũ iidiagu mware eropa gojabeobu.

*Erã mera majagu igu ñero iirare cãdijidoreñumi Pablo Jesu yarãre*

<sup>5</sup> Mwa mera majagu igu ñero iira mera yure bujawerecũ iimi igu. Mware igu turaro bujawerecũ iidiro dopa ta yu sãre wãaro bujawerecũ iimi igu. Igu marire eropa buringã bujawerequerecũ ta wãatariaro dipuwaja moadorebeaa dohpaguere. <sup>6</sup> Bajarã mwa mera majarã igu ñero iira dipuwaja moatuhãnorã. Iripẽta dipuwaja moa duhuro gahmea igure. <sup>7</sup> Igure mwa dipuwaja moaniguicũ buringã bujawerebocumi igu. Eropigu Cristo yare duhubocumi. Eropirã igu ñero iirare cãdijique mwa. Igure itamuque igu õaro siporãcuboro dopa. <sup>8</sup> Eropirã igure õaro iique mwa igure mwa mahirare igu masiboro dopa. Mwa eropa iicũ buringã gahmea yuhũ. <sup>9</sup> Ero core mware gojabeogu “¿Diaye ta yure yuhrirãcuri?” arĩ pepigu gojabeobu mware. Yure mwa yuhricũ iadiagu gojabeobu. <sup>10-11</sup> Dohpaguere igu ñero iirare mwa cãdijicũ iagu yu sã igu ñerire cãdijigura. Yure ñero iibirimi igu. Mwapure ñero iidi arĩmi. Igu eropa iidigu arĩquerecũ ta igu ñero iirare cãdijia yu sã. Mware õaro itamudiagu Cristo igu ihabeoro igu ñero iirare cãdijia. Irire cãdijia Satana marire igu tarinugabiriboro dopa. Igu mari ñerire iicũ gahmemi. Irire

õaro masia. Eropirã Jesu yarã erã ñeri iirare guñaniguibeaa mari Satana yapure iiri arĩrã.

*Troa waĩcũri maca árĩgu Titore bocabigu wũaro bũjawere pepiñumi Pablo*

<sup>12</sup> Eropigu Troa waĩcũri macague Cristo yare buhegu ejaribũ. Erogue yũ ejacũ bajarã masa õari buherire peediarã árĩma. Mari Opũ ĩgu itamuri mera ĩgu yare yũ buherire peerã bajarã masa árĩma. <sup>13</sup> Eropa árĩquerecũ ta mari acaweregu Titore bocatĩribirinijagu wũaro bũjawere pepigu erore árĩmasibiribũ, Eropigu ero majarãre goeriseretuhagu Macedonia yebague waha wabũ ĩgure amagu.

*Goãmũ marire tarinugacũ iimi, arĩ gojañumi Pablo*

<sup>14</sup> Goãmure mucubiriri mera “Õhaa,” arãa. Goãmũ ñerire árĩpehrerire tarinugagu ãhrimi. Cristo yarã mari árĩcũ ĩagu marire tarinugacũ iimi. Poresudiro poresu sehyaboro dopa ta ãhraa mari. Poresu sehyaro dopa ta Goãmũ dorero mera árĩpehreroguere Cristore masicũ iiaa mari. Eropa ĩgure masirã erã õaro pepima. <sup>15</sup> Cristo yarã arĩrã masare Cristore guñacũ iiaa mari. Mari eropiicũ ĩha Goãmũ mucubirimi. Masare Cristore guñacũ iicũ erã ĩgu árĩrire masima. Goãmũ ĩgu taumorã Cristo árĩrire masima. Gajirã erã peamegue wamorã sã Cristo árĩrire masima mari mera. <sup>16</sup> Cristo árĩrire masirã erã peamegue wamorãpũ peamegue erã waborore masima erã. Goãmũ ĩgu taumorãpũ árĩpehrerinũri ĩgu mera erã arĩburire masima. Eropirã ire Cristo yare mari mari gamero mera

buhe ojogorocumasibea. Goãmũ ïgũ itamuri mera ta mari ïgũ yare buhe ojogorocumasia. <sup>17</sup> Bajarã gajirã Goãmũ yare buhemaacãma niyerure wajatadiarã. Gũapũ erã iro dopa ta iibeaa. Gũyaro mariro Cristo ïgũ turari mera ïgũ yare buhea gũa. Goãmũ gũare ïgũ obeorã árĩrã ïgũ ïhurore õaro buhea gũa.

### 3

*“Õpa ïgũra,” Goãmũ ïgũ arĩ werepirare mama buherire wereñumi Pablo*

<sup>1</sup> ¿Dipaturi gũa árĩricũrire mũare wererã iiri gũa mũa pepicũ? Gajirã mũare erã buheboro core erã buheri queoro árĩrire masidiarã erã gojarapũre serẽmũhtabũ mũa erãre. ¿Gũare masituhaquererã ta iripũnore serẽri mũa gũare? ¿O gajirã pohroque gũa buherã warã iripũnore gũare aĩgãro gahmeri mũa pepicũre? <sup>2</sup> Iripũnore gamebeaa gũa. Mũapũre õari gohrotonirãre árĩpehrerã gajirã ïarã mũare gũa õaro buherare masirãcoma. Mũare gũa buhecũ Cristore umupeorã ïgũ yarã árĩnũgabũ mũa. <sup>3</sup> Cristo yarã mũa árĩcũ ïarã masa mũare Goãmũ ya buheri gohrare gũa queoro buherare masituhama. Mũare buherã Goãmũ yagũ Espĩritu Santo ïgũ itamuri mera buheabũ. ïgũ Goãmũ ojocarigũ gohra ãhrimi. Gũa eropa buhecũ peerã Cristore õaro gahmeabũ mũa. Eropa gamerã mũa árĩcũ gajirã mũare ïarã Cristo yarã mũa árĩrire õaro masima. Eropa masirã mũare Goãmũ ya buheri gohrare gũa queoro buherare masima masa.

4 Eropa wacũ masia gua Goãmure guñaturari mera. Cristo ïgu itamuri mera eropa guñaturaniguia mari. 5-6 “Gua gamero i mohmerire iiaa gua,” arĩmasibea. Goãmũ ïgu itamuri mera ire iiaa gua.

Eropigu dohpaguere ïgu wererire õari buherire Goãmupũ õaro guare buhemasicũ iimi. Eropa buherã iribojegue ïgu doreri Moisere ïgu apira dorerire buhebeaa. Espiritu Santo mera mari Goãmũ mera õaro árĩburipũre buhea gua. ïgu dorerare mari gamero mera ne bocatiubeaa. Eropa mari bocatiubirira dipuwaja peamegue waboya mari. Espiritu Santopũ mari Goãmũ mera árĩpehrerinũri õaro árĩniguicũ iimi. Õari buheri buhecũ peeñanirãre õaro árĩniguicũ iimi.

7 Goãmũ ïgu dorerire utãmijirigue gojani-jagu Moisere apiñumi. ïgu eropa apira pũhrũ ïgu árĩro gosesiriri dehyoamuriyoro Moiserere “Goãmũ ïgu apira õari ãhraa,” arĩro dopa. Eropiro Moise diapo burigã gosesiriyoro. Cuimiju árĩyoro. Pũhrũ ïgu gosesiriri pehrerisubũ ïgu árĩquerecũ ta masa ïgure ne ãamehtumasibiriñuma. Iri dorerire ïgu apira pũhrũ iri dorerire iibirã masa dipuwajacurã peamegue wamorã wañuma. Eropiro iri doreri masare peamegue wadorequerero ta, Goãmũ ïgu árĩro gosesiriri mera árĩnũgayoro. 8 Iri doreri tauro õari buheripũ “Jesucristo masare taumi,” arĩ buheri õataria. Iri buherire gajirãre mari buhecũ erã õaro peecũ Goãmũ ta erã mera árĩgucumi ïgu Espiritu Santo mera. Eropiro



iribojegue maja doreri tauro Cristo ya buheripũ õataria. <sup>9</sup> Goãmũ Moisere apira doreri iribojegue maja masare peamegue wadoreyoro. Eropa dorequerero Goãmũ ãgũ gosesiriri mera árĩnũgayoro. Iri tauro õari buheripũ Goãmũ ãgũ turari mera ãhraa. Iri buheri mera õarã wahama masa Goãmũ ãgũ ãacũ. <sup>10</sup> Iribojegue Goãmũ ãgũ doreripũ turari árĩquerero dohpague bu gohra ta ãhraa. Õari buheripũ iri tauro turatariari ãhraa. Iri buheri mera ãmaroguere mari wamasia. <sup>11</sup> Iribojegue Goãmũ ãgũ doreri Moisere ãgũ apira doreri Goãmũ gosesiriri mera árĩnũgaquerero ta pehburi árĩyoro. Õari buheripũ “Jesu marire taugũcumi,” arĩ buheripũ árĩnũguicãroca. Eropiro “Iri doreri tauro õari buheripũ õataria,” arĩ masia mari.

<sup>12</sup> Irire eropa masirã, gũiro mariro õari buherire õaro werepehocãa gũa. <sup>13</sup> Moise gũa iro dopa árĩbiriñumi. ãgũre Goãmũ ãgũ gosesiriri pehrerore yũ acawererã masiri arĩgũ dopa ãgũ diapore suhri gasiro mera cãhmotacãñumi Moise. <sup>14</sup> Moise ãgũ diapore ãgũ cãhmotacũ Goãmũ gosesiririre ãgũ õarire erã ñecũ sũmarã ãhamasibiridiro dopa ta erã dohpague õari buherire õaro masibeamã. Goãmũ wererire iribojegue erã gojarapũrere erã buherã ne masibeamã erã Israe masapũ. Cristore gamebirã masisome erã. ãgũre umupeorã tamera ãgũ yare masirãcoma. <sup>15</sup> Dohpague sãre Israe masa Goãmũ dorerire Moisere ãgũ apirare buhequererã, erãre cãhmotaro dopa ta ne masibeamã erã. <sup>16</sup> Erã mari Opũre Jesucristore erã gamecũ ãgũ

ta erãre masicũ iimi. Iri cãhmotariñere aĩro dopa ta mari Opũ marire ĩgu yare õaro masicũ iimi. <sup>17</sup> “Mari Opũ,” arĩrã Espĩritu Santore arĩrã iiaa. Mari Opũ ĩgu Espĩritu Santo mari mera ĩgu árĩcũ ĩgu yarã ãhraa. Eropa árĩrã “Iribojegue maja dorerire iiro gahmea Goãmũ yarã árĩmorã,” arĩbeaa mari. <sup>18</sup> Eropirã Jesu yarã árĩrã, Jesucristo ĩgu õarire ĩhmurã iiaa mari. Eropigũ mari Opũ Espĩritu Santo marire gohrotocũ iimi. ĩgu eropa iicũ Cristo õagu árĩdiro dopa ta õarã warã iiaa mari sã.

## 4

<sup>1</sup> Goãmũ guare mojomoro ĩagu, õari buherire weremorãre apimi guare. ĩgu eropa apicũ masirã ĩgu yare buherã duhudiabeaa. <sup>2</sup> Masa ĩabiro ñerire iicoreri guhyasiuri ãhraa. Irire guapũ ne iibeaa. ĩgu yare buherã guyarire buhebirĩbũ. Eropirã gua Goãmũ yare ne gohrotobeaa. Eropa iibirã õari buherire õaro diaye buhea gua Goãmũ ĩgu ĩhuro árĩrã. Gua eropa árĩricũre arĩpehrrerã õaro masima guare ĩarã gohra. <sup>3</sup> Gua iri buherire õari buherire werea. Gua irire buhequerecũ ta gajirã masibeama. Eropa masibirãpũ peamegue wamorã ãhrima. <sup>4</sup> Satana ñegu i yeba majarã opũ erãre Goãmũ yare masibiricũ iimi. Cuirĩ ĩhajabirã erã ĩhajabiro dopa ta masibirã wacũ iimi erãre. Õari buherire Cristo ĩgu turarire erã masibirã wacũ iimi ĩgu erãre. Cristo Goãmũ ĩgu árĩricũre opami. ĩgu Cristo Goãmũ gohra ta ãhrimi. <sup>5</sup> Gua buherã “Gũapũre umupeoque,” arĩ buhebeaa. Õpa arĩ

buhea gũa: “Jesucristopũ ãhrimi mari Opũ,” arĩ buhea gũa. Gũapũ Jesure yũhrirã ãhraa. Eropirã mũare itamurã ãhraa gũa. <sup>6</sup> Negohraguere õpa arĩ dorepũ Goãmũ i umũ naitĩaro árĩcũ: “Boyoro árĩque,” ãgũ arĩcũ boyoa wayoro. Eropigũ dohpaguere ãgũ ta iri turari mera marire masicũ iimi boyoro árĩro dopa. Eropa marire masicũ iigũ ãgũ õaro árĩricũre marire masicũ iimi. Jesucristore masirã ãgũ Pagũ ãgũ õaro árĩricũre masia mari.

*Cristo turari mera mari ãhraa, arĩ gojañumi Pablo*

<sup>7</sup> Eropa masirã árĩrã, Goãmũ ãgũ turarire gajirãre masicũ iiaa. Eropa iirã árĩquererã ta turabirã ãhraa gũapũ. Mátasoro mata wahrirasoro iro dopa ta gũa sã turabirã ãhraa. Gũa eropa turabirã árĩquererã ta gũa masare Goãmũ yare werecũ ãarã, gũa gamero mera iimasibirirare ãarã õpa arĩ masirãcoma erã. “Goãmũ turari mera eropa arĩ wereniguima marire,” arĩrãcoma masa. Eropirã Goãmũpũre umupeorãcoma. <sup>8</sup> Árĩpehrerã gajirã gũare ñero iiquererã ta Goãmũ gũare taucũ erã gũare tarinũgabeama. Eropirã gũa gariborequererã ta ne Goãmũ yare buhe duhudiabeaa. <sup>9</sup> Gũare erã ñero iinigiquerecũ ta Goãmũ gũare eropa itamuniguicãmi. Gũare erã pamehpiquerecũ ta ãgũ itamuri mera sĩribeaa gũa. <sup>10</sup> Erã wejẽsũmorã árĩcãrã tiiaa gũa Cristo i yebaguere ñero ãgũ taridiro dopa ta. Erã wejẽsũmorã árĩquererã eropa árĩniguirã tiiaa gũa sã Cristo ãgũ ojocaririre ãhmumorã. <sup>11</sup> Eropirã umũri

nꝛꝛꝛ gajirã guare wejẽmaja guhya ãhrama Cristo yarã gua árĩri dipuwaja. Ôpa ta ñero tariquererã árĩniguia gua Cristo ĩgu ojocaririre ĩhmumorã. <sup>12</sup> Eropirã mũare gua buheri dipuwaja guare gajirã wejẽmaja guhya ãhrama. Gua buherire mũa peenirãpũ ʼmũri nꝛꝛꝛ Goãmũ mera árĩmorã ãhraa.

<sup>13</sup> Goãmũ yare erã gojarapũ ôpa ãhraa: “Goãmũre umupeobũ. Eropigũ ĩgu yare werebũ,” arĩ gojañumi iribojegue majagũ. Gua sã yujuropa ta ãhraa. Goãmũre umupeorã ĩgu yare werea. <sup>14</sup> I sãre ôaro masirã ĩgu yare werea gua. Cristo ĩgu sĩrira pũhrũ Goãmũ ĩgũre masudĩ árĩmi. Eropigũ Cristo yarã mari árĩcũ ĩagũ ĩgu mari sãre masugũcumi. ĩgu eropa masura pũhrũ ĩgu pohrogue aĩgãgũcumi marire. <sup>15</sup> Eropirã mũare itamudiarã ñero taria gua. Eropirã Cristo yarã mũa bajarã warã, bajarã mũa Goãmũre mucubiriri mera umupeorãca. ĩgũre “Ôhaa,” arĩrãca.

<sup>16</sup> Mũa eropa umupeocũ ĩarã, gua ñero tariquererã ta bũjawerebeaa. Eropirã Cristo yare were duhubeeaa. Gua dũpũ ʼmũri nꝛꝛꝛ turabiri wahgãro iiaa. Eropa turabiri wahgãquererã ta ôaro sĩporãcũ Jesucristore guñaturari mera. <sup>17</sup> Dohpaguere ñero tariquererã ta pũhrũ ñero tarisome. Eropirã Cristo yare were duhubeeaa. Iri ñero mari tariri pehrea waroca. Eropirã marire merogã ñero tariro gahmea. Eropa mari ñero tarinirã árĩrã, pũhrũguere wũaro mucubiriri mera árĩniguirãca Goãmũ mera.

Eropirã mari ñero taridiro tauro buringã mucubiriri mera eropa árñiguicãrãca. <sup>18</sup> Eropirã mari ñarire dohpaguere mari warore guñanurubeaa. Mari ñabiriripure pührũ mari Goãmũ mera árñiguiburire guñanurua. Mari dohpaguere ñari pehrea waroca. Mari ñabiriripũ árñiguicãroca.

## 5

<sup>1</sup> I sãre masia mari: Wihire mari cóãdiro dopa ta mari dũpũre cóãrãca. Eropigũ mama wihi iibodiro dopa ta Goãmũ mama dũpũre iigucumi. Eropigũ iri dũpũre marire ogucumi. Eropirã umaroguere eropa árñiguirãca iri dũpũ mera. Irire masirã ñero tariquererã Goãmũ yare duhubeaa. <sup>2</sup> Eropirã iri dũpũre umaro maja dũpũre turaro gamerã, mari eropa coreniguirã iiaa. <sup>3</sup> Suhrirore turaro mari sañadiaro dopa ta iri dũpũre turaro gahmea mari. Eropã ta cohrea mari iri dũpũ marirã árĩdiabirã. <sup>4</sup> Dohpague maja dũpũre cóãdiabiriquererã umuri nũcũ Goãmũ mera mari árĩburi dũpũre buringã gahmea mari. Eropirã i mari dũpũ sĩriburi dũpũ iri árĩcũ masirã, mama dũpũ mera Goãmũ mera eropa árñiguidiaa mari. <sup>5</sup> Mari igũ mera árñiguiborore amuyudi árĩmi Goãmũpũ. Eropã amuyugũ igũ Espĩritu Santore omũhtami marire. Eropigũ igũ Espĩritu Santo mari mera árĩcũ ñha marire Goãmũ igũ iiborore, “Diaye ta ãhraa,” arĩ masia mari.

<sup>6</sup> Eropirã Goãmũ mera sĩporã turarã ãhraa. Gũiro mariro ãhraa mari. I sãre mari masia. I dũpũ mari árĩmũhtara dũpũ mera árĩrã,

mari Opu pohro árĩnibea. <sup>7</sup> Ũmaro majare Goãmu sãre mari ĩabiriquererã ta “Ĩgu diaye ta ãhrimi,” arĩ masia mari. Eropirã ĩgure umupeoa. <sup>8</sup> Eropirã mari Goãmu pohro waborore masia. Mari dupure i yeba maja dupure cóãrã mari Opu mera umarogue mari árĩdiaa. <sup>9</sup> Eropirã Cristore mucubiricũ iidiaa mari. I yeba maja dupu mera árĩrã ĩgure mucubiricũ iidiaa mari. Ũmarogue árĩrã sã ĩgure mucubiricũ iidiaa. <sup>10</sup> Árĩpehrerã Cristo pohrogue mari wacũ ĩagu ĩgu mari iirare beyegucumi. Eropiro mari iira masisũroca. Eropigu marire õarire mari iira wajare ogucumi. Ñerire mari iira waja sãre ogucumi. ĩgu eropa beyegu árĩcũ masirã ĩgure mucubiricũ iidiaa mari.

*Goãmure mari mera õaro árĩcũ iimi Cristo, arĩ gojañumi Pablo*

<sup>11</sup> Eropirã guhyadiaro mera mari Opure umupeoro gahmea marire. ĩgu marire eropa beyeburire masirã, Cristo yare masicũ iiaa gua masare. Erãre gũisãrã, ĩgure umupeocũ iidiaa gua. Gua õarã árĩrere Goãmu õaro masimi. Gua eropa iirire mua sãre õaro masicũ gahmea yuhũ. <sup>12</sup> Dipaturi gua õarã árĩrere mũare wererã iibea. “Gajirãre tarinũgaa,” arĩmaacãnirãre mua wereburire eropa wererã iiaa gua mũare. Erã basi eropa arĩ pepirãpu erã pepiriguere ñerã, guyaricũrã árĩquererã ta masa erã ĩhuro dihtare õarã iro dopa iirima. Eropirã mua guare mucubiriboro dopa, “Õaro iirã iima,” gajirãre mua guare arĩ cãhmotaburire i árĩpehrerire

mũare were gojarã iiaa. <sup>13</sup> ¿Gua õpa arĩ wererã pee masibirã åhriri gua mua ãacũ? Masa guare ãarã pee masibirã iro dopa ãhama guare. Goãmũ yare gua werecũ ãarã eropa ãabocoma guare. Erã eropa arĩ ãabonirã árĩquererã ta pee masirã ta åhraa gua mũare eropa itamumorã. <sup>14</sup> Cristo ãgu guare mahicũ ãarã masare eropa itamua. ãgu eropa mahicũ ãarã ãgu yare eropa buheniguia gua. Marire mahigu yujugu ta Cristo mari árĩpehrerã ya ñeri dipuwajare sĩridi árĩmi. Eropigu árĩpehrerã mari ñeri dipuwajare sĩrimorã árĩnirãre sĩribasadi árĩmi. Irire guñarã ãgu yare iiniguia gua. <sup>15</sup> Árĩpehrerã mari ñeri dipuwajare sĩridi árĩmi ãgu mari gamero dopa mari iibiriboro dopa. Eropigu ãgu gameripure iidoregu sĩridigu árĩmi ãgu. Maripure Goãmũ pohroque mari ejaborore eropa sĩridi árĩmi. ãgupu mari ya árĩburire sĩrira puhru masa mũriadi árĩmi. Eropirã mari gamero dopa mari ãaribejarire iibirã ãgu yare iiro gahmea pare marire. <sup>16</sup> Eropirã dohpaguere Jesure gamebirã gajirã erã árĩricure ãha werewũaro dopa ne arĩ ãabeaa gua. Iribojegue gua Cristore eropa ãaquererã dohpaguere ãgure õaro masia. <sup>17</sup> Eropirã árĩpehrerã Cristo yarã warã õaripure gohrotoa mari. Iribojegue mari gamero mari árĩrare duhucãa mari. Dohpaguepure õaripure corerã iiaa mari.

<sup>18</sup> Goãmupu marire õarire gohrotocũ iimi. Iribojegue mari Goãmũ mera õaro árĩbirimũribũ. Eropigu Jesucristo mari ñeri iira dipuwaja sĩribasara mera Goãmũ marire ãgu mera õaro

árĩcũ iidi árĩmi. Eropa iigu guare ĩgu yare buhedoregu apimi. Eropa buherã, gajirãre Goãmu mera erã õaro árĩcũ iiaa gua sã. <sup>19</sup> Õpa arĩ masare weredoremi Goãmu guare: “Mari masa ĩgu mera õaro árĩbirinirã árĩquerecũ Goãmu Cristo sĩrira mera marire ĩgu mera õaro árĩcũ iimi. Eropigu Cristore mari umupeocũ ĩagu mari ñeri dipuwajare dipuwaja moabeami Goãmu marire,” arĩ weredoremi Goãmu guare. <sup>20</sup> Eropirã Cristo yare weremorã ĩgu obeonirã ãhraa gua. Goãmu ĩgu basi muare ĩgu werebodiro dopa ta guapu muare õpa arĩ werea: Cristore werebasarã iiaa. Eropirã muare werea. Goãmuere mua ĩhaturirare iripẽta duhuque. <sup>21</sup> Cristo ĩgu ñerire iibiriquerecũ ta Goãmu ĩgure mari ñeri dipuwajare sĩridoredi árĩmi. Eropa iigu mari ñeri dipuwajare dipuwaja moadi árĩmi Goãmi ñeri dipuwajare dipuwaja moabeami Goãmu marire,” arĩu Jesucristore. ĩgu eropa iidi árĩmi Cristo yarã mari wacũ, Goãmu iro dopa õarã mari árĩboro dopa.

## 6

<sup>1</sup> Goãmu eropa iigu ĩgu muare ĩgu õaro mójomoro ĩarare ĩhmumi. Eropirã Goãmu yare mohmebasarã árĩrã ire turaro muare iidorea gua. Goãmu õaro iirare õari buherire mua peediro dopa ta iique mua. Mua peediro dopa ta mua iibiricũ mua peera duhpiburi árĩbeaa. <sup>2</sup> Õpa arĩmi Goãmu ĩgu yare erã gojarapũgue: beami Goãmu marire,” arĩ Muare yu õaro iiburinuri árĩcũ mua serẽrire pee yuhrigura. Eropigu muare peamegue



wabonirãre yu tauburinuri árĩcũ  
itamugura, arĩmi ĩgu.

Peeque mua. Dohpaguere Goãmu masare ĩgu  
õaro iiburinuri ãhraa. Dohpaguere masa Je-  
sucristore umupeoburinuri ãhraa Goãmu erãre  
tauboro dopa. Eropirã dohpaguere ĩgure umu-  
peoro gahmea, arĩ werea gua.

<sup>3</sup> “¿Õari buheripure gamebiribocuri?” arĩrã,  
ne merogã gajirãre ñero iibeaa gua. Gajirãre  
ne ñero arĩ wereniguibeaa. <sup>4</sup> Irire iibirã Goãmu  
pohro majarã gua árĩrire mũare masicũ iidiaa.  
Eropirã ĩgu yare buherã õpa ãhraa gua: Ñero  
tarirã gajino moorã bocatĩua. Guare erã ñero  
iiquerecũ ta guaro mariro ãhraa. <sup>5</sup> Õpa ñero  
taribu gua: Masa guare pacũ, peresu erã iicũ,  
masa bajarã guare wejẽdiarã erã gaguiniguicũ  
peerã ñero taribu gua. Gua turaro mohme oẽarã  
sã, wuja pũriquerecũ ta carĩbirã sã, oaboarã  
sã ñero taribu. <sup>6</sup> Eropirã õaro árĩricuri mera  
diaye buhebu. Eropirã Goãmu yare buherã  
õaro masiri mera buhebu mũare. Eropirã ne  
guabiribu gua. Eropirã õaro mera buhebu gua  
mũare. Eropa iirã Goãmu pohro majarã gua  
árĩrire ĩhmurã iibu gua mũare. Espĩritu Santo  
ĩgu itamuri mera eropa ta Goãmu pohro majarã  
gua árĩrire ĩhmurã iibu gua mũare. Eropirã  
diaye mũare gua mahicũ ĩarã ĩgu pohro majarã  
gua árĩrire masia mua. <sup>7</sup> Eropirã õari buherire  
diaye mũare werecũ ĩarã, Goãmu turari mera  
gua iicũ ĩarã, ĩgu pohro majarã gua árĩrire masia  
mua. Õaripu árĩpehreri gua iira gua mojo iro  
dopa ãhraa gua õaro cãhmotaboro dopa. Iri

ōarire iirã gũa watĩre cãhmotarã iiaa. Eropirã iri ōari gũa iira mera gũa ĩgũre tarinũgaa. <sup>8</sup> Eropa iirã gajirã gũare umupeoma. Gajirãpũ gũare umupeobeama. Gajirã ōaro wereniguima gũare. Gajirãpũ ñero arĩ wereniguima gũare. Diaye gũa werequerecũ ta “Gũyarã ãhrima,” arĩ weresãma gajirã gũare. <sup>9</sup> Gajinũrire gũare masirã dopa iima. Gajinũrire gũare masibirã dopa iima. Gũare erã wejẽdiaquerecũ ta ojocarinia gũa. Erã bũrigã panirã árĩquererã ta ojocaria gũa. <sup>10</sup> Gũa yujuyerinũri bũjawererã árĩquererã ta, eropa mucubiriniguia. Mojomorocurã árĩquererã ta erãre ōari buherire buherã erãre wũaro doberire gũa obodiro dopa ta iirã iiaa erãre. Gajino moorã árĩquererã ta, diaye ta Goãmũ yare opapehocãa gũa.

<sup>11</sup> Corinto majarã, yũ acawererã, mũare ōaro mera werepeho gojabũ gũa mũare. Mũare turaro mahirã eropa werebũ. <sup>12</sup> Gũapũ mũare mahi duhubirabũ. Mũapũ gũa mahibiriñaria. <sup>13</sup> Eropigũ yũ porãre yũ werebodiro dopa ta mũare weregũra: Mũare gũa pepidiro dopa ta mũa sã eropa ta ōaro pepique gũa. Eropirã gũa mahique mũa.

*Cristore umupeobirãre wapicũdorebiriñumi Pablo*

<sup>14</sup> Eropirã Cristore umupeobirã mera eropa wapicũniguibiricãque. Erã mera majagũ árĩbita. Yujuro mera árĩbeaa mũa. Ōarire iigũ, ñerire iigũ mera ōaro árĩmasibeami. Boyoro iro dopa árĩrã Goãmũre gamerã ãhrima. Naitĩaro iro dopa árĩrã Goãmũre gamebirã ãhrima.

Eropirã erã perã game wapicumasibeama. <sup>15</sup> Eropigu Cristo watĩ mera yujuro pepibeami. Eropigu Cristo yagu, Cristore umupeobigu mera õaro game wapicumasibeami. <sup>16</sup> Goãmure umupeori wihigue goãmarã wéanirãre mari apicũ queoro wabeaa. Eropa ta Cristo yarã Cristore gamebirã mera wapicuniguicũ queoro wabeaa. Erã pe curu majarã yujuro mera erã árĩmasibeama. Goãmũ wihi iro dopa ãhraa mari. Īgu wihi árĩro dopa ta mari mera ãhrimi ĩgu. Ōpa arĩñumi Goãmũ ĩgu yare erã gojarapũgue:

Erã mera ta árĩgura yũhũ. Eropigu erã watope ta eropa árĩniguigura. Yũhũ Goãmũ erã opu árĩgura. Eropirã erãpu yaharã masa árĩrãcoma, arĩñumi ĩgu.

<sup>17</sup> Eropigu õpa arĩnemoñumi ĩgu mari Opu:

Erã ñerã mera ne dujabita. Eropirã erãre wapicubita. Yũre gamebirã yare ñerire ne iibiricãque. Eropigu yũpu mũare wapicugura. <sup>18</sup> Eropigu mũa pagu árĩgura. Mũaru yũ porã árĩrãca, arĩñumi mari Opu turatariagu.

## 7

<sup>1</sup> Yũ acawererã, yũ mahirã, mũare ire weregura: I árĩpehrerire Goãmũ marire ĩgu eropa arĩ wrecũ ĩarã árĩpehrerire mari dũpũre goroweorire duhurã. Eropirã mari pepiri sãre goroweorire duhurã. Eropirã Goãmure õaro umupeori mera ñero iiro mariro árĩrã mari.

*Pablo mucubiriri mera wereñumi Corinto majarãre*

<sup>2</sup> Ōaro guare mahique. Ne merogã mera ñero iibiribũ gua mware. Eropirã gua buheri mera mware ñero iicũ ne iibiribũ gua. Ne yujugure mua mera majagure guvari mera waja gamebiribũ. <sup>3</sup> Eropa arĩgu “Dipuwajacurã ahraa mua,” arĩgu iibea mware. Mware mahia gua. Irire mware weretuhabũ. Ojocarirã yuju curu ta ahraa mari. Mari sĩrira pũhrugue sãre yuju curu ta arĩrãca mari. <sup>4</sup> Ōaro mua iirare masia yũhũ. Eropigu mware guñabeogu mucubiria. Eropirã gua ñero taririsubure mua õaro iira querere pee burigã mucubiribũ yũhũ.

<sup>5</sup> Eropi Macedonia yebague gua ejara pũhrũ, erogue ejarã ne soobiribũ gua. Eroguere ñero taribũ gua. Gajirã gua mera game dũyasoma. Eropirã “Cristo yare duhubocoma,” arĩrã Cristo yarãpũre wũaro guñaricubũ gua. <sup>6</sup> Gua Eropa ñero taricũ Goãmũpũ guare õaro sĩporãcucũ iimi. Īgu marire bujawererãre mucubiricũ iigu ahrimi. Eropigu Tito gua pohrogue ĩgu dujariro mera guare mucubiricũ iimi Goãmũ. <sup>7</sup> Tito ĩgu eracũ ĩarã mucubiribũ. Iri dihtare mucubiribiribũ. Mware ĩgu õari quere werecũ sãre turaro mucubiribũ. Yũre mua ĩadiarare weremi guare. Yũre mua bujawerera sãre weremi ĩgu. Yũre “Goãmũ yare iigu iimi Pablo,” mua gajirãre arĩ werera sãre weremi ĩgu. Īgu Eropa arĩcũ peegu turaro mucubiribũ yũhũ.

<sup>8</sup> Ero core yũhũ mua ñero iirare were gojabeorapũ mera mware merogã bujawerecũ iiribũ.

Eropa iidigu árĩqueregu ta “Iri carta mera ñero iibũ,” arĩbeaa. Iripũre mua buhera pũhrũ bujawereyoro mua. Eropigu ne gojabeora pũhrũ ta “¿Ñero iiri yũhũ?” arĩ pepiribũ. Eropa arĩqueregu ta “Ñero iibũ,” arĩbeaa dohpague. <sup>9</sup> Dohpague tamerare mucubiria yũhũ. Mua bujawererare peegu mucubiribea. Mua bujawererã õaripũre gohrotorapũre peegu mucubiria yũhũ. Mua ñero iirare bujawerecũ ãagu Goãmũpũ mũare õarire gohrotocũ iidi árĩmi. Eropirã mũare bujawerecũ iirã ñero ii goroweorã iibiribũ gua mũare. <sup>10</sup> Eropirã Goãmũ ãgu gamero dopa ta bujawererã, mari ñerire bujawere õaripũre gohrotorãca. Eropa ta mari bujawerecũ ãagu mari peamegue wabonirãre taumi Goãmũ. Eropiro mari eropa bujawerecũ õha ãhraa marire. Cristore gamebirãpũ erã bujawerequererã erã ñerire duhubirã peamegue wamorã árĩnima. <sup>11</sup> Mũapũ Goãmũ ãgu gamero dopa ta bujawereayoro. Mua eropa bujawererã õpa iirã waĩcuabũ mua: Dohpague ñerire iirãre eropa ãacãbirã waĩcuabũ mua. Ne iri ñerire gamebirigohracãyoro mua. Erã ñeri iira mera guayoro. Erãre ñerire iirire duhudorerã waĩcuabũ mua. Eropirã erã ñerire gũirã waĩcuabũ mua erã iro dopa iiri arĩrã. Eropirã yure mahirã yure ãadiayoro mua. Eropirã ñeri ãigure dipuwaja moayoro. Iri árĩpehrerire mua iira mera iri ñeri dipuwaja marirã mua árĩrĩre ãhmuabũ mua guare. <sup>12</sup> Iribojegue ñero ãigure mũare were gojabeoqueregu ta ãigure itamubu eropa arĩ gojabeobiribũ yũhũ. ãgu ñero iidigu

sãre itamubu eropa arĩ gojabeobiribũ. Mũapũre itamubu iripũre gojabeobũ. Goãmũ ãgũ ãhurore gũare õaro umupeoa mũa. Irire mũa umupeorare mũa õaro gunãboro dopa iripũre gojabeobũ mũare. <sup>13</sup> Eropirã Tito mũa iira quere gũare werecũ peerã bũrigã mucubiria gũa.

Tito sã mũa mera turaro mucubiricũ ãha gũa sã mucubiribũ. ãgũre mũa õaro mera bocatĩricũ peerã, mũa mera ãgũ mucubirirare peerã, gũa sã õaro mucubiribũ. <sup>14</sup> Negohraguere mũa pohro ãgũ waboro corere mũa mera yũ mucubirirare, õarã mũa árĩrare werebũ ãgũre. Eropirã yũ arĩdiro dopa ta õaro iiaýoro mũa ãgũre. Eropigũ ãgũre yũ arĩrare gũhyasĩribirabũ. Titore mũare gũa werera diaye ta árĩbũ dohpaguere ãgũ ãadiro dopa ta. <sup>15</sup> Mũa pohrogue ãgũ ejacũ umupeori mera bocatĩriayoro mũa. Eropirã gũhyadiaro mera ãarã tarinũgaro mariro mũa yũhrĩã árĩcũ ãapũ ãgũ. Eropigũ mũare mahinemogũ iimi ãgũ. <sup>16</sup> Dohpaguere õaro yũhrĩã Goãmũ ãgũ gamero dopa ta mũa õaro mũa iipehorã árĩcũ õaro masia yũhũ. Eropa masigũ bũrigã mucubiria.

## 8

*Cristo yarã árĩrã gajirãre eropa ocãro gahmea marire, arĩ gojañumi Pablo*

<sup>1</sup> Gũa acawererã, ire mũare masicũ gahmea gũa. Cristo yarã Macedonia yeba majarã Goãmũ mahiri mera ãgũ mojomoro ãari mera erã iirare mũare weregũra. <sup>2</sup> Erã ñero tariquererã ta, niyeru moorã árĩquererã ta mahiro mariro

eropa ocãma gajirãre. Cristo mera turaro mucu-  
birirã árĩrã, erã gajirãre òaro mera erã oparire  
eropa ocãma. <sup>3</sup> Mũare arĩḡũ iiaa. Erã erã  
oparopê orã, tauñariro oma. Erã gamero oma  
erã. <sup>4</sup> Goãmũ yarãre mojomorocũrãre turaro  
itamudiarã, erãre erã obeerire aĩdorema ḡware.  
<sup>5</sup> “Ipê orãcoma erã,” arĩ ḡua pepidiro tauro  
oma erã. Ōpa iima erã: Negohraguere niyerure  
erã oboro core mari Opũ ĩḡũ gamerire iidiarã  
árĩtuhama. Eropirã Goãmũ ĩḡũ gamero dopa  
ta ḡua sãre umupeori mera yũhrinirã árĩma.  
Eropa iirã árĩrã erã niyeru sãre oma. <sup>6</sup> Erã  
eropa ocũ ĩarã Titore ḡuarũ òpa arĩbũ: “Erãre  
mũ buhenũgadiro dopa ta Corinto majarã sãre  
erã mojomorocũrãre oburire wereque,” arĩbũ  
ḡua ĩḡure. Mũa sã gajirãre mojomoro ĩarã mũa  
itamuboro dopa eropa arĩbũ ĩḡure. <sup>7</sup> Eropirã  
mũarũ árĩpehrerire òaro iirã árĩtuhaa. Cristore  
diaye ta òaro umupeoa mũa. Eropirã ĩḡũ yare  
òaro werea. Eropirã Goãmũ yare òaro masia  
mũa. Eropirã Goãmũ ĩḡũ gamero dopa ta turaro  
iidiaa. Eropirã ḡware mahia mũa. Eropa ta  
òaro iirã árĩtuhaa mũa. Mũa eropa òaro iirã  
árĩquerēcũ ta merogã duhyania mũa iipehoburi.  
Mojomorocũrã tamerare mũa mojomoro ĩacũ  
gahmea ḡua. Eropirã erãre mũa òaro mera  
wũaro ocũ gahmea ḡua.

<sup>8</sup> Eropa arĩḡũ mũare doregohragũ iibea yũhũ.  
Eropa arĩ wereḡũ iiaa mũare. Gajirã mo-  
jomorocũrãre erã turaro itamurare mũare wereḡũ  
iiaa. ¿Mũa diaye ta gajirãre mojomoro ĩhari?  
arĩ masidiagũ iiaa. <sup>9</sup> Mari Opũ Jesucristopũ

marire ĩġu mojomoro ĩarare masia m̄a. Iri diaye ta āhraa. ĩġu ɯmaroguere w̄aro opagu árĩquereġu ta i yebaguere arĩġu mojomoroc̄aro waru. Eropĩġu m̄a ya árĩburire sĩrĩġu s̄a mojomoroc̄aro waru. Őra ta waru m̄ar̄u m̄a w̄aro opaboro dopa, ĩġu mera m̄a ōaro árĩniguic̄aborore.

<sup>10</sup> M̄are wereġu iiaa. Őra pepia yur̄u: Yuju bojori wahaa m̄a mojomoroc̄ar̄are odiara pur̄u. M̄ar̄u mojomoroc̄ar̄are odiam̄htarib̄u. Eropir̄a er̄are om̄htabonir̄a árĩb̄u m̄a. <sup>11</sup> Eropir̄a m̄a odiarare dohpaguere oho ojogoroc̄uque. M̄a odiam̄htadiro dopa ta dohpaguere ōaro opehoque. Eropir̄a pagari opar̄a árĩr̄a w̄aro oque. Meroḡa opar̄a árĩr̄a meroḡa oque. <sup>12</sup> B̄arĩḡa m̄a odiari mera irire m̄a orare Goām̄ mucubirĩġucumi. Eropir̄a ōaro m̄a omasirop̄e oque. M̄a orop̄e ta mucubirĩġucumi. M̄a opabirirare m̄a oc̄u gamebeami ĩġu.

<sup>13</sup> “Mojomoroc̄ar̄are oque,” arĩġu er̄are w̄aro opadoreġu iibeaa. Eropĩġu m̄ar̄ure mojomoroc̄ar̄a dujac̄u iidiabeaa. <sup>14</sup> M̄are yujuro mera opadoreġu eropa arĩġu iiaa. Dohpaguere m̄ar̄u w̄aro opaa. Eropa opar̄a gajinore moor̄are omasia m̄a. Pur̄u m̄are gajino mooc̄u er̄a s̄a m̄are omasima. M̄a eropa game or̄a yujuropa opar̄aca árĩpehrer̄a Cristo yar̄a. <sup>15</sup> Eropa ta āhraa Goām̄ yare er̄a gojarap̄u: “W̄aro aĩġu s̄a gajĩġu tauro opabeami. Meroḡa aĩġu s̄are ne meroḡa duhyabeaa,” ar̄a Goām̄ yare er̄a gojarap̄u.



*Tito ĩġu mera majarã mera Corintogue wañumi*

<sup>16</sup> Eropi mware yu itamudiro dopa ta Tito sã mware itamudiami. Goãmuru ĩġu itamudiacũ iimi ĩġure. ĩġu eropa iicũ ĩaġu “Õhaa,” arãa Goãmure. <sup>17</sup> Titore ġua mua pohrogue wadorecũ ĩġu õaro mera yuhriami. Eropiġu ĩġure mua pohrogue ġua wadoreboro coregue ta mua pohroguere “Wagura,” arĩ ġuñatuhadi ãhrami ĩġu.

<sup>18</sup> ĩġu ġajigũ Jesu yaġu mera wapimoa obeobu ġua. Tito mera majagũ árĩpehrerã ġajirã Jesu yarã erã umupeogu ãhrimi. Õari buherire õaro ĩġu mohmegũ árĩcũ ĩarã ĩġure õaro umupeoma. <sup>19</sup> Eropirã Jesu yarã ĩġure ta ġahmeama ġua mera curibure. Iri niyerure mojomorocurã pohrogue ġua aĩcũ ġua mera curibure ġahmeama ĩġure. Iri niyerure mua gameneorare ġua mojomorocurãre orã wacũ ĩarã mojomorocurãru “Marire mari Opũ itamugũ iimi,” arĩrãcoma. ġua eropa ocũ, erãre burigã mari itamudiarare masirãcoma. <sup>20</sup> Eropirã i niyerure wũaro Jesu yarã erã odorere ġua aĩrã õaro ĩhadiburãca erã orare ġuare weresãri arĩrã. <sup>21</sup> Mari Opũ ĩġu ĩhabeoro diaye õaro iidiaa ġua. Eropirã masa erã ĩhuro sãre õaro iidiaa.

<sup>22</sup> Eropã iimorã ġajigũre mari acaweregũre obeorãca Tito sã mera. ġua ĩġu mera obeogũre bajasuburi ġajirãre ĩġu õaro itamucũ ĩabu ġua. Eropiġu dohpaguere murũ ġajirãre mua itamudiacũ ĩaġu ero core ĩġu iidiro tauro õaro mware itamudiami. <sup>23</sup> Tito sãre mware werẽgũra. ĩġu

yɥ mera majagɥ āhrimi. Mɯare yɥ itamucũ ĩgɥ yɥ mera mohmegɥ āhrimi. Gajirã ĩgɥ mera wamorã Jesu yarã erã beyenirã erã obeorã āhrima. Erã Cristo yare iima gajirã Cristore erã umupeoboro dopa. <sup>24</sup> Erã eropa árĩrãre mahiri mera õaro erãre bocatĩrique mɯa. Mɯa eropa iicũ ĩarã gajirã Jesu yarãpɥ õarã mɯa árĩricũre masirãcoma. Mari obeonirãre “Õaro mera bocatĩrirãcoma Corinto majarã,” arĩ weretuhabɥ gɯa mera majarãre. Mɯa eropa õaro bocatĩricũ ĩarã gɯa werera diaye árĩcũ ĩha masirãcoma gajirã Jesu yarã.

## 9

*Jesu yarãre mojomorocũrãre erã oburire wereñumi Pablo*

<sup>1</sup> Eropirã Goãmɥ yarãre mɯa itamuborore mɯa oburire masituhaa mɯa. <sup>2</sup> Gajirãre mɯa itamudiarire masia yɥ sã. Eropa masigɥ Macedonia majarãre õpa arĩ werebɥ: “Corinto majarã Jesu yarãpɥ gajirãre itamudiatuhama. Yuju bojori taria erã itamudiadiro,” arĩ weretuhabɥ erãre mɯare. Mɯa eropa itamudiacũ peerã bajarã erã sã mojomorocũrãre itamudiamã. <sup>3</sup> Mɯa mojomorocũrãre oborare gajirãre werequeregɥ “Iri niyerure gameneobiribocoma yɥ ejaboro core,” arĩ pepia mɯare. Eropigɥ dohpaguere oãre mari acawererãre mɯa pohrogue obeomũhtagɥ iiaa. Mojomorocũrãre mɯa oburire gameneo mɯa opayuboro dopa oãre obeomũhtagɥ iiaa. <sup>4</sup> Erãre obeobigɥ Macedonia yeba

majarã mera mua pohrogue yu ejagu, mua oburire mua opabiricũ ãagu gũhyasĩrisãboya yũhu mũare. “Mojomorocũrãre orãcoma,” yũhu mũare arĩra pũhrũ mua obiricũ ãagu gũhyasĩrisãboya yũhu mũare. Mua sã gũhyasĩriboya. <sup>5</sup> Eropigu mua pohrogue yu ejaboro core erãre mari acawererãre obeomũhtagũ iiaa. “Mojomorocũrãre wũaro orãca,” mua arĩrare mua opayuboro dopa erãre obeomũhtagũ iiaa. Mua oburire mua gameneocũ erãpũ mũare weresererãcoma. Eropigu yũpũ eja mua oburire mua opayutuhacũ ãha mucubiriri mera mua odiarare masigũra. Mũare gũa odorera árĩsome iri.

<sup>6</sup> Eropirã ire guñaque mua: Bajameyerigã otedigu bajamegã dũcare aĩgũcumi. Bajayeri otedigu baja dũca Eropigu mua pohrogue yu ejaboro core erãre mari acawererãre obeomũhtagũ iiaa. “Mojomorocũrãre wũaro orre aĩgũcumi. Eropa ta ãhraa mojomorocũrãre mari ocũ. Merogã mari ocũ, Goãmũ merogã ogũcumi marire. Wũaro mari ocũ wũaro marire ogũcumi. <sup>7</sup> Eropirã yujurãyeri mua “Ipẽ ogũra,” arĩ oque. Mahĩnari obiricãque. “Marire odoreama,” arĩro mariro oque. Mucubiriri mera orãre gahmemi Goãmũ. <sup>8</sup> Ĩgũpũ mua gameri tauro mũare ogũcumi. Eropirã árĩpehrerire mua gameri dũhyarire opapehorãca. Eropirã gajirãre mua oburi sã õaro sihajaroca mua opari. <sup>9</sup> Eropa ta ãhraa Goãmũ yare erã gojarapũ:

Mojomorocũrãre wũaro ohomi ĩgu. Õaro mera masare itamuniguimi ĩgu, ãhraa ĩgu yare

erã gojarapũ.

<sup>10</sup> Eropiro oteri ðucacura pũhrũ oteri masũ ãgu oteburi coyere ohomi Goãmũ. Pũhrũ ãgu oterare ðucacucũ iimi ãgu baburire. Mojomorocurãre mũa wũaro ocũ oteri masure ãgu coyere oro dopa ta mũa sãre wũaro ogucumi Goãmũ. Eropa ta mũare ogucumi mojomorocurãre mũa onemoboro dopa. <sup>11</sup> Eropa ta ãhraa. Wũaro ogucumi gajirãre wũaro mũa eropa onigucicãboro dopa. Eropirã mũa iri niyerure odorerare gua ocũ erã ñearãpũ mucubiriri mera Goãmure “Õhaa,” arĩrãcoma. <sup>12</sup> Eropirã mojomorocurãre Goãmũ yarãre orã, erãre itamurã iiaa mũa. I dihtare iibeaa mũa. I sãre iirã iiaa mũa. Mũa eropa orã bajarã masa Goãmure mucubiriri mera “Õhaa,” arĩcũ iirãca mũa. <sup>13</sup> Eropa mũa gajirãre itamucũ ãarã, Goãmure umupeori mera wereniguirãcoma masa. Eropirã erãre gajirã sãre wũaro mũa ocũ ãarã Goãmure “Õatariagu ãhrimi,” arĩrãcoma masa. Eropa arĩrãcoma Cristo ya buherire õari buherire mũa õaro yũhricũ ãarã. <sup>14</sup> Eropirã Goãmũ ãgu mojomoro ãadiro dopa ta mũa sã erãre mojomoro ãacũ erãpũ mũare gamerãcoma. Eropa gamerã mũare serẽbasarãcoma Goãmure. <sup>15</sup> Goãmũ marire õatariaro iigucumi. ãgu eropa iiborore masirã “Õataria,” arãa mari ãgure.

## 10

*Jesu ãgu apidigu ãgu arĩrire wereñumi Pablo*

<sup>1</sup> Dohpaguere yũhũ Pablo mũare weregura. Cristopũ ne guabigu, masare õaro iigu arĩñumi.

Īḡu iidiro dopa ta yu sã muare werediaa  
 õari mera. Yujurãyeri mua mera majarã  
 õpa arãyoro yure. “Mari mera árĩḡu eropa  
 pepicãḡu bu árĩḡu iro dopa árĩmi Pablo. Eropã  
 árĩquereḡu ta gajipugue árĩḡu marire doyarõ  
 mariro turibeomi,” arãyoro mua yujurãyeri  
 yure. <sup>2</sup> Eropigũ muare ire burigã dorea: Mua  
 pohrogue yu ejacũ õaro iique mua, “¿Pablo  
 ḡuare turiri?” arĩrã. Yujurãyeri yure õpa  
 arãyoro: “Īḡu, ĩḡu gamero, Goãmu dorebiri-  
 querecũ iimi,” arãyoro mua yure yujurãyeri.  
 Eropã arĩrã tamerare turiboca yuhũ. <sup>3</sup> Ḡua sã  
 i yeba majarã ta árĩrã iiaa. Eropã árĩquererã ta  
 i yeba majarã erã gamero iiro dopa ta iibeaa ḡua.  
<sup>4</sup> Surara erã tarinũgaro dopa ta ḡuapũ ñerire  
 tarinũgadiaa. Surara erã mojo oparo dopa ta ḡua  
 sã mojo opaa. Ḡua mojo i yeba majarã erã masiri,  
 erã wereniguitarinũgari, erã turari árĩbeaa. Ḡua  
 mojo Goãmu ya turaripũ ãhraa. Iri turari mera  
 masa Goãmure erã umupeodorebirirare duhucũ  
 iiaa ḡua. Eropirã erã gamero erã masirire iri  
 duhpiburi árĩbircũ masicũ iiaa ḡua iri turari  
 mera. <sup>5</sup> Eropirã árĩpehrerã erã gamero pepirare  
 Goãmure erã masidorebirirare duhucũ iiaa ḡua.  
 Eropirã iri turari mera Goãmure gamebirãre Cri-  
 store õaro yuhrirã erã árĩcũ iiaa ḡua. Cristo ĩḡu  
 gamero dopa ta erãre pepicũ iiaa ḡua. <sup>6</sup> Eropirã  
 gajirã mua mera majarã Cristore tarinũgacũ ĩarã  
 erãre dipuwaja moamorã árĩrãca ḡua. Mua õaro  
 yuhrira puhru Cristore tarinũgarãpũre eropa  
 dipuwaja moamorã árĩrãca ḡua.

<sup>7</sup> Yu árĩricari dihtare masia mua. Yu

pepiripüre ne masibea mũa. “Cristo yarã ãhraa,” arĩrã árĩrã õpa masique mũa: Gũa sã mũa iro dopa ta Cristo yarã ta ãhraa. <sup>8</sup> “Mari Opũ ya buherire õari buherire buhedoregũ apimi gũare,” arĩgũ bajasuburi mũare iri dihtare eropa arĩ werequeregũ ta gũhyasĩribea yũhũ. Gũare eropa buhedoregũ mũare itamumorãre apimi gũare. Mũare goroweomorãre apigũ iibirimi gũare. <sup>9</sup> I yũ gojabeoripüre mũa ãha Ʃcacũ gamebeaa yũhũ. <sup>10</sup> Yujurãyeri mũa mera majarã õpa arãyoro: “Pablo gojabeogũ pũriro dihta gojabeomi marire. Eropa arĩqueregũ ta mari mera arĩgũ eropa arĩcãgũ ãhrimi. Bu arĩgũ iro dopa ãhrimi. Eropiro ãgũ marire wereniguiri duhpiburi arĩbeaa,” arãyoro mũa yujurãyeri. <sup>11</sup> Eropa arĩrãre õpa arĩ weregũra: Mũa arĩdiro dopa ta iibea gũa. Mũare gũa arĩ gojabeodiro dopa ta eropa ta arĩ wererãca mũa pohro arĩrã. Eropirã “Õpa iirãca,” gũa arĩ gojabeodiro dopa ta eropa ta iirãca mũa pohro arĩrã sã.

<sup>12</sup> Yujurãyeri mũa mera majarã “Õaro masipehorã ãhraa gũa,” arĩ wereniguimaacãma erã basi. Erã game ãha bocatĩrirã “Maripũ õatariarã ãhraa,” arĩma erã. Eropa arĩmaacãrã “¿Gajirã õarã iro dopa ãhriri mari?” arĩbeama erã basi. Gũarũ erã iro dopa iisome. <sup>13</sup> Goãmũ gũare ãgũ buhedore ãgũ apira dihtare werea gũarũ mũare. Gajirã erã mohmerare “Iibũ gũarũ,” arĩrã iibea. Goãmũ mũa sãre buhedoregũ gũare apimi. <sup>14</sup> Eroparĩrã gũyarã iibea gũa. Õari buherire Cristo yare mũare buhemũhtarã ta ejabũ gũa. Eropirã Goãmũ

gũare buhedore ãgũ apira dihtare wererã iiaa mũare. <sup>15</sup> Eropirã gajirã mũare itamucũ ãha “Gũapũ irire iibũ,” ne arĩbeaa gũa. Cristore mũa umupeonemocũ iiburipũre gahmea gũa. Eropa gamerã mũare buhenemodiaa gũa. Eropa gũa buherã Goãmũ ãgũ apirañe pẽta buhediaa gũa mũare. <sup>16</sup> Eropa buhediaa mũa ya yeba core majarãre õari buherire peebirãre õari buherire wererã waboro dopa. Eropa warã gajirã erã buhera pũhrũ ejarã, “Gũapũ erãre buhemũhtabũ,” arĩsome gũa.

<sup>17</sup> Goãmũ yare gojarapũgue õpa ãhraa: “Mari iirire ãarã mucubiribircãro gahmea. Mari Opũ ãgũ iiripũre ãarã mucubiro gahmea. Iripũre gajirãre werero gahmea,” arĩ gojara ãhraa. <sup>18</sup> Masa erã basi “Gũapũ iiabũ,” erã arĩcũ ãha mucubiribeami Goãmũ. Mari Opũ Cristo Goãmũre “Oã õaro iima,” ãgũ arĩrãpũre sũami Goãmũ.

## 11

*“Jesu ãgũ apinirã ãhraa gũa,” arĩ gũyarãre wereñumi Pablo*

<sup>1</sup> Yũ basi yũ arĩricũre weregũ pee masibigũ iro dopa weregũ iiaa, arĩ pepia. Yũ arĩricũre mũare weregũ gũhyasĩriñaria. Yũ eropa arĩ werecũ peenique mũa yũre dohpague. <sup>2</sup> Goãmũ mũare ãgũ mahiro dopa ta turaro mahia yũ sã mũare. Nõmeo gajigũ umũ mera igo ñero iibigo igo yujugare ta gamedigo iro dopa mũa Cristo dihtare gamecũ gamerabũ yũhũ mũare. <sup>3</sup> Eropa gamequeregũ “Erã Cristo yare cóãbocoma,” arĩ guñaricũa

mũare. Gajirã ñerã mũare gũyarã, gajiropa arĩri buherire gamecũ iibocoma mũare. Pĩru ĩgũ masiri mera Evare gũyacũ igo Goãmũre tarinũgañumo iribojegũere. ĩgũ eropa iidiro dopa ta dohpaguere ñerã mũare gũyarã, Cristore mũa õaro umupeorire goroweobocoma. Eropigũ mũare gũisãa. <sup>4</sup> Erã gũa mũare buhediro dopa ta buhebiriquerecũ mũa peeraa. Eropirã erã “Õpa árĩdi árĩmi Jesu,” erã gamero gajiropa arĩ werequerecũ ta peea mũa. Watĩ ĩgũ pepiro dopa arĩ erã werequerecũ ta peea mũa. Mũare gũa weregũ Espĩritu Santo gohra ãhrimi. ĩgũpũre erã werebiriquerecũ ta mũare gũya buherãre peea mũa. Erã gajiropa árĩri buherire erã buhecũ õari buherire erã buhebiriquerecũ ta irire peea mũa. <sup>5</sup> Erã “Jesu ĩgũ apinirã ãhraa,” arĩnirã yũre masitarinũgabeama. “Erãre doca merebeaa,” arĩ pepia yũhũ. <sup>6</sup> Õaro were-tarinũgagũ árĩbiriboca yũhũ. Õaro weretari-nũgabiriqueregũ Goãmũ yare õaro masia. Yũ eropa masirire bajasuburi mũare masicũ iibũ.

<sup>7</sup> Õari buherire Goãmũ yare mũare buhegũ ne waja gamebiribũ. Mũare itamudiagũ waja gamebiribũ. Bu árĩgũ iro dopa árĩbũ yũhũ. ¿Yũ eropa waja gamebircũ õabeari mũa pepicũ? <sup>8</sup> Mũare yũ buhecũ gaji macari majarã Jesu yarã yũre itamura. Erã eropa orare ñeabũ mũare itamubu. Mũa yũre oborare erãpũ yũre oma. <sup>9</sup> Mũa mera árĩgũ gajino yũre duhyaquerecũ ta mũare niyerure ne serẽbiribũ. Mari acawererã Macedonia yeba majarã Jesu yarã árĩpehrerã yũ gamerare aĩ erama yũre. Iribojegũere mũare



ne garibobiribũ yũhũ. Pũhrũgue sãre mũare ne garibosome. <sup>10</sup> Cristo diaye ãgu werediro dopa ta yũ sã mũare dohpaguere diaye weregu iiaa. Árípehrero Acaya yeba árírãre i mũare yũ serẽbirirare eropa wereniguigũra. <sup>11</sup> ¿Mũare yũ serẽbirirare gajirãre yũ eropa wereniguicũ peerã dohpa pepiri mũa? “Pablo guare eropa arĩ weregu guare umupeobigu iimi,” ¿arĩ pepiri mũa? Áríbeaa. Mũare umupeoa. Goãmũ irire masimi.

<sup>12</sup> Waja mariro yũ mũare buhenũgadiro dopa ta buhe ojogorocũgũra. “Jesu ãgu apinirã ãhraa,” arĩ guyanirãre yũre tarinũgacũ iibiriboro dopa waja mariro buheniguigũra. Erãpũ “Gũa sã Pablo iro dopa Jesu yare buherã ãhraa,” arĩma. Eropa áríbeama. Yũpũ waja mariro buhea. Erãpũ waja gamerã buhema. <sup>13</sup> Erã diaye ta Jesu ãgu apinirã gohra áríbeama. Erãre ne apibiriñumi ãgu. “Jesu ãgu apinirã ãhraa,” arĩ guyarã guã iro dopa árírima erã. <sup>14</sup> Erã eropa iicũ ãagu ãhamariabeaa yũhũ. Satana sã anyu Goãmũ yagu õagu iro dopa dehyoacumi masare. <sup>15</sup> Eropigu erã Satanare itamurã õarã Goãmũre itamurã iro dopa erã iicũ ãagu, ãhamaria wabeaa yũhũ. Dohpaguere erã eropa iiquerecũ ta pehrerinũ áricũ árípehreri erã ñero iira dipuwaja dipuwaja moagũcumi Goãmũ erãre.

### *Ãgu ñero tarirare wereñumi Pablo*

<sup>16</sup> Dipaturi mũare ire weregũra. Ne “Pee masibigu ãhrimi,” yũre arĩbiricãque. Yũ eropa arĩdorebiriquerecũ ta yũre mũa eropa arĩ

pepicũ õaroca yũre. “Pee masibigu ãhrimi,” arĩ yũre pepiquererã ta peenique mua yũre. Merogã yũ árĩricũreire yũ basi werecũ peenique mua. <sup>17</sup> Mũare eropa weregu guhyasĩriñaria yũhũ. Pee masibigu iro dopa iigu iiaa, arĩ pepia. Mari Opũ Jesu yũre irire “Eropa wereque,” arĩbirimi. <sup>18</sup> Igu eropa arĩbiriqerrecũ ta ire weregũra mua. Erã gamero “Õarã ãhrraa,” arĩmaacãrã erã árĩcũ ãagu yũ sã yũ árĩricũreire mua weregũra. <sup>19</sup> Mũapũ eropa arĩmaacãrãre peerã mucubiriri mera ãhaa mua erãre. ¿Õaro masirã ãhriri mũapũ eropa peerã? <sup>20</sup> Mũare erã pohro majarã moacũ, mua yare erã emacũ eropa ãacãa mua. Eropirã mũare erã docapicũ mua wayuporãre erã pacũ eropa pepicãa mua. <sup>21</sup> ¿Õapũricãri mũare erã eropiicũ? Cue, ¿tutaratarã ãhriri erã? Gũapũ erã iro dopa turarã árĩbeaa. Eropirã erã iro dopa ñerire iibeaa.

Erã iro dopa arĩbiriqerregũ ta erã “Õpa árĩrã ãhrraa,” erã arĩcũ peegu yũ sã eropa arĩ wereboca. Dipaturi guhyasĩriqerregũ ta õpa arĩgũra mũare. <sup>22</sup> Erã “Hebreo masa ãhrraa,” arĩma gajirãre tarinũgadiarã. Hebreo masũ ta ãhrraa yũ sã. “Israe masa mari Pagũ ãgu beyenirã ãhrraa,” arĩma daja erã. Erã iro dopa ta ãgu beyedigũ ta ãhrraa yũ sã. “Abrahã pãramerã ãhrraa,” arĩma daja erã gajirãre tarinũgadiarã. Erã iro dopa ta Abrahã pãrami ta ãhrraa yũ sã. <sup>23</sup> “Cristo yare itamurã ãhrraa,” arĩma daja erã. Yũ sã Cristo yare itamugu ta ãhrraa. Erã tauro Cristo yare õaro iiaa yũhũ. Eropa yũ basi arĩ wereniguigu guhyasĩriñaria yũhũ. Pee

masibigu iro dopa wereniguigu iiaa, arĩ pepia yu basi. Erã tauro mohmebu yuhu Cristo yare iigu. Bajasuburi erã tauro Cristo yagu yu arĩri dipuwaja peresu iima yure gajirã. Erã tauro bajasuburi tãrama masa yure. Erã tauro Cristo yare yu iira dipuwaja masa yure wejẽdiarima. Eropigu merogã mera taribu yu s̃iribodirore. <sup>24</sup> Cinco suburi judio masa yure ñeama. Yure erã ñeari nucu suburi treinta y nueve suburi yure tãrama. <sup>25</sup> Æhresubu gajirã yure ñeama. Eropa ñearã erã tamera yure ñero yucugu mera pama. Gajisubu yure gajirã utã mera deama. Æhresubu dohodiru mera utãyegue mehtuhaja miribu. Eropigu yujunũ, yuju ñami taboamiji wecague wũariya decoguere baa payabu. <sup>26</sup> Bajasuburi macariguere buhe curigu ejabu. Yu eropa buhe curicũ guhyatariacãbu yure. Yure mirimaja guhya arĩbu. Yure yajamaja guhya arĩma. Yaha yeba majarã judio masa, judio masa arĩbirã sã yure ñero iimaja guhya arĩma. Macarigue, masa marirogue, wũariyague sãre yure s̃irimaja guhya arĩbu. “Mu mera majarã ãhraa,” arĩ guyarã sã yure ñero iimaja guhya arĩma. <sup>27</sup> Cristo yare iibu burigã mohmebu. Eropa mohmegu ñero wabu. Bajasuburi wuja yure ñero pũriquerecũ ta eropa mohmenigucãmuribu. Ñero oaboamuribu. Eropiro yure ñemesibumuribu. Bajasuburi barire bocabirimuribu. Yuhu yusaro sãre pepimuribu. Suhri sañaburi sã ne marimuribu yure.

<sup>28</sup> Eropa ñero tarigu ta umuri nucu gajirã Cristo yarãre, mua sãre burigã guña.

29 Eropigu Cristo yagu ĩgu turabiricũ ĩagu bujawerea yũhũ. Gajirã Cristo yagure ñero iidorebocoma. Erã eropa iicũ ĩagu Cristo yagure guhyasĩrisãgu, erã ñero iidorerã mera guaa yũhũ. 30 Werediabiriqueregu ta yũ árĩricũrire weregu, yũhũ turabigu yũ árĩrire mua masiboro dopa mũare weregura. 31 Goãmũ mari Opũ Jesu Pagũ mũari nũcũ mari umupeobu ĩgu ta mũare yũ guyabiricũ masimi. Ire mũare diaye weregura. 32 Damasco waĩcũri macague yũhũ Jesucristo yare buhecũ ĩagu árĩpehrejã masa tauro opũ Areta waĩcũgu ĩgu doca árĩgu opũ yũre ñeadiaripũ. Eropa ñeadiagu iri maca maja sãiro disiporori nũcũ surarare coredoreripũ. 33 Erã eropa corero watope ta yũ mera majarã wũari puibugue yũre duhusã iri sãiro pũrũpũgue yuju gobegue yũre duhu dijuma. Erã eropa duhu dijura pũhrũ duhriğã wabũ.

## 12

### *Cristo ĩgure ĩhmurare wereñumi Pablo*

1 Yũ árĩricũrire mucubiriri mera yũ werecũ duhpiburi árĩbeaa. Duhpiburi árĩbiriquerecũ ta werenemogura mũare. Mari Opũ Jesu ĩgu yũre ĩhmurare ĩgu yũre masicũ iirare weregura mũare. 2 Őpa ĩhmunũgami ĩgu yũre: Catorce bojori gohra waha yũre Cristo yagure mũarogue ĩgu aĩ mũriara pũhrũ. Őmarogue necã wecague yũre aĩ mũriami. Yũ sĩporã dihtare ĩgu aĩgãcũ masibea yũhũ. O yũ dupũ sãre ĩgu aĩgãcũ sãre ne masibea yũhũ. Goãmũ dihta irire

masimi. <sup>3-4</sup> Eropigu paraíso waĩcurogue yure aĩ m̄arijami. Irire masia yũhũ. Yũ s̄iporã dihtare ĩgu aĩgãcũ masibea yũhũ. O yũ d̄upũ s̄are ĩgu aĩgãcũ masibirica. Goãmũ dihta irire masimi. ĩgu eropa aĩ m̄uriacũ ejagu eroguere ĩgu wererire peebũ. Iri yũ peerare masa ne masibeamã. Iri wererire gajirãre weredorebirimi yure. <sup>5</sup> Eroguere ĩgu yure eropa wererare m̄are weregũ, “Yũhũ yujugũ ta gajirãre tarinũgagu ãhraa,” arĩboya yũhũ. Eropigu irire werebeaa yũhũ. Yũ masibirira dihtare yũ turabirira dihtare mucubirigu m̄are weregũra. <sup>6</sup> “Gajirãre tarinũgaa yũhũ,” m̄are arĩ werediacũ yũ arĩra diaye árĩboca. Eropigu eropa arĩ weregũ eropa arĩmaacãbiriboya yũhũ. Eropa árĩbiriqueregũ ta “Õpa gajirãre tarinũgaa,” arĩ weresome yũhũ m̄are, gũhyadiaro yure ĩhari arĩgu. Yũ árĩro tauro m̄a yure umupeocũ gamebeaa.

<sup>7</sup> Cristo õatariarire umaroguere ĩgu yure ĩhmucũ ĩadigu árĩgu, “Gajirãre tarinũgaa yũhũ,” arĩboca yũpũ. Eropa yũ arĩbiriboro dopa Satana ĩgu yure dore moacũ ĩagu “Õaroca,” arĩ apidi árĩmi Goãmũ. Eropigu yũ ñero tariboro dopa yure dore moadi árĩmi Satana. Iri dore poraru ñajaro dopa ta yure p̄uribũ. <sup>8</sup> Iri dore yure taridoregũ serẽm̄uriribũ mari Op̄ure. Õhresubu serẽribũ. <sup>9</sup> Yũ eropa serẽquerecũ ta i dore tamerare yure taricũ iibirimi ĩgu. Õpa arĩ yure yũhrim̄urimi ĩgu: “M̄re mahia. Yũ mahiri mera õaro árĩgũca m̄hũ. P̄uriniguicãsũgu, turabigu árĩgu yũ turarire õaro ĩhmugũca m̄hũ. Turarã tauro m̄hũ yũ turarire masare

masicũ iigũca,” arĩ yũhrimurimi Goãmu yũre. Ìgu eroparĩcũ peegu turabigu yũ arĩrare masigu mucubiria. Eropigu yũ turabirirare masare mucubiriri mera weregũra. Eropa arĩ weregũca Cristo ìgu turaripure yũhũ gajirãre òaro masicũ iiboro dopa. <sup>10</sup> Eropigu Cristo yagu yũ arĩri dipuwaja yũre pũriro arĩquerecũ ta, gajirã ñero yũre wereniguiquerecũ ta, ñetariaro tariqueregu ta, yũre erã ñero erã iiniguiquerecũ ta, yũre bujawerecũ erã iiquerecũ ta mucubiria yũhũ. Eropa ñero tariqueregu ta, eropa turabigu arĩqueregu ta Cristo turari mera bocatĩua ìgũre guñaturagu. Eropigu mucubiria.

*Corinto majarãre Cristo yarãre wũaro guñaricũñumi Pablo*

<sup>11</sup> Yũ arĩricurire yũ basi weregu guhyasiriñaria yũhũ. Pee masibigu iro dopa weregu iiaa, arĩ pepia yũhũ. Yũ eropa werequerecũ ta iri mua ya dipuwaja ãhraa. Mũapũ yũ arĩricurire gajirãre òaro werecũ yũ basi werebiriboaya. Yũhũ bu arĩgu arĩqueregu ta “Jesu ìgu apinirã ãhraa,” arĩ guyarãre doca merebeaa yũhũ. <sup>12</sup> Diaye ta ñero tarigu arĩqueregu mũare Goãmu turari mera deyoro moarire ii ìhmuribũ. Eropa ii ìhmugu Cristo ìgu apidigu yũ arĩrire ìhmugu iiribũ mũare. <sup>13</sup> Gaji macari majarãre Jesu yarãre mua sãre yujuro mera ìhmuribũ yũhũ. Mũapũre gajiropa ñari iiribũ. Mua dihtare garibobiriribũ. Mua dihtare gajinore yaha arĩburire serẽbiriribũ. ¿Yũhũ mũare itamurire serẽbircũ ñehe arĩri mũare? Iri ñeri arĩcũ irire cãdijique mua yũre.

14 Ire peeque mua. Pesubu mua pohrogue yu ejara pũru dipaturi wadiaa daja. Erogue ejagu mũare garibosome yũhu. Gajinore serẽsome yũhu mũare. Mua yare gamebeaa yũhu. Cristo yapũre mua yũhrirã árĩcũ gahmeaa yũhu. Masa porãpu erã pagu sumarãre erã gamerire obeama. Erã pagu sumarãpu erã porã gamerire ohoma. Eropa ta mua yu porã iro dopa árĩrã yu gameripũre osome mua. 15 Eropigu yu tamera yu oparipũre odiaa mũare itamubu. Mua pohro majagu iro dopa árĩdiaa mũare itamubu. Mũare yu turaro mahiquerecũ ta mũapu yũre daberogã mahia yu pepicũ.

16 Eropigu mua mera árĩgu mũare garibobiribu. ¿Eropa ta iiari yũhu mua pepicũ? Eropa iiquerecũ ta yujurãyeri mua mera majarã õpa arĩrãcoma: “Pablo gajinore marire aĩdiagu gũyami,” arĩrãcoma. 17 ¿Erã arĩro dopa ta iigu árĩgu dohpa irire iiboyuri yũhu? ¿Mua pohrogue yu obeonirã ñehenore yũre gũyabasayuri erã mũare mua ãacũ? 18 Sohõ árĩrasubugue Titore mua pohrogue wadoretuhabu ãgure. Eropigu gajigure Jesu yagure ãgu mera obeobũ. ¿Tito mũare gajinore gũya aĩri mua ãacũ? ãgu yu iro dopa ta Goãmu ãgu gameri dihtare iigu aĩrimi. ¿Eropigu yu iro dopa ta iibiriri ãgu mua ãacũ?

19 ¿Ipũ mera gua basi arĩ cãhmotarã iiri gua mua pepicũ? Árĩbeaa. Cristo yarã aĩhraa. Eropirã Goãmu ãgu ãhuro mũare wererã iiaa. Yu acawererã, yu mahirã, mũapũre eropa arĩ werea mũare itamudiarã. 20 Yu erogue ejacũ yu gamero

dopa iirã árĩbiriboca mua. Eropigu muare turaro guñaricua. Eropigu mua gamero dopa iigu árĩbiriboca yu sã erogue ejagu. Gajiropa mua iicũ ñagu weregũca muare. Erogue yu ejacũ muarũ mua basi game duyatorã, gajino erã opacũ ñarã ñhaturirã, mata guarã, mua gamero gajirãre tarinũgadiarã, gajirãre ñero wereniguirã, ñeri quere moarã, “Gua tamera gajirãre tarinũgaa,” arĩrã, mua gamenererore goroweorã árĩboca mua. Mua eropa iicũ bocaboca arĩgu, guñaricua yũhu muare. <sup>21</sup> Erogue yu ejacũ muare yure guhyasĩrisãcũ iibocumi Goãmũ yure. Eropigu arĩpehrerã iribojegue ñero iinirãre erã ñerire bujawerebircũ ñagu turaro bujaweregũca yũhu. Nome mera ñero iirãre, ñerire uaribejarãre ñagu bujaweregũca yũhu.

## 13

### *Pablo weretuñumi*

<sup>1</sup> Dohpaguere mua pohrogue wagu uhrsubu ejagũca eroguerẽ. Pesubu ero coreguere ejatuhabu. Eropigu muare ire weregũra. Ōpa ãhraa Goãmũ yare erã gojarapũ: “Yujugure mari dipuwaja moaboro core perã, urerã ñgure weresãro gahmea. Erã eropa weresãra puhru dipuwaja moamasia mari,” ãhraa Goãmũ yare erã gojarapũ. <sup>2</sup> Iribojeguere ñero iirã mua arĩcũ muare arĩpehrerã gajirã ñero iirã sãre dipaturi guhyadiaro mera weregũra. Yujusubu ejadi mua pohro dipaturi ejagu muare ire werebu. Dohpaguere mua mera arĩbigũ dipaturi muare



ire werebeogu iiaa daja: Dohpaguere mua pohroguere ejagu, ñero iirãre diaye ta dipuwaja moagura yuhũ. <sup>3</sup> Yu eropa iicũ ãarã, Cristo ãgu apidigu ãgu turari mera yu buhecũ masirãca masidiarã. Cristopũ muare doregu turatariagu aãhrimi. Eropigu ãgu turarire ihmumi muare. <sup>4</sup> Mari iro dopa dupucugu, ãgu turabigu arãgu, crusague siripu. Eropa siriqueregu ta Goãmu ãgu turari mera ojocarimi ãgu dohpaguere. Gua sã ãgu iidiro dopa ta turabirã aãhraa. Eropa turabirã arãquererã Cristo mera ojocarirã Goãmu ya turari mera arãrãca muare itamumorã.

<sup>5</sup> Eropi muapu mua basi opa arã pepique. “¿Diaye ta Cristore umupeogu aãhriri yuhũ?” arã pepique mua. Diaye ta Cristo mua mera majagu ãgu arãbiricũ ãgu yarã gohra arãbeaa mua. <sup>6</sup> ¿Mua guapũre “Jesu yarã ãgu apinirã arãbeama,” arã pepiri? ãgu yarã gohra aãhraa gua. Irire mua masicũ gahmea yuhũ. <sup>7</sup> Eropigu mua ñero iibiriboro dopa Goãmũre serẽbasaa muare. Eropa serẽbasaa gua mua õarire mua iiboro dopa. Mua Goãmũ itamuri mera eropa õarire iicũ ãarã opa arãboca: “Guapu erãre õarã wacũ iibu,” arãboca gua gajirãre guare umupeocũ iimorã. Eropa arã umupeodorebeaa gua. Iri duhpiburi arãbeaa. Eropirã muare eropa Goãmũre serẽbasarã mua ya arãburire serẽbasarã iiaa. Õarire mua iicũ tamerare gahmea gua. <sup>8</sup> Eropa dihta gahmea gua. Goãmũ ya diaye arãrãre goroweomasibea gua. <sup>9</sup> Eropirã mua õarire iicũ gamerã turabirã iro dopa arãquererã gua mucubiria. Õarire

iirãpũ mũapũ turarã árĩcũ õhaa. Eropirã mũa õarã waborore Goãmũre serẽbasaniguicãrãca gũa mũare. <sup>10</sup> Eropigũ mũa mera árĩbigũ mũare ipũre gojabeoyugũ iiaa. Mũa pohrogue ejagũ mũa ñero iirã árĩcũ ãagũ mũare dipuwaja moagũca. Cristo yũre ãgũ dorediro dopa ta mũare dipuwaja moagũca. Yũ eropa dipuwaja moabiriboro dopa ipũre mũare gojabeoyugũ iiaa. Mũa õarire gohrotocũ ãadiagũ gojabeoyugũ iiaa. Cristo ãgũ dorediro dopa mũare itamudiaca. Mũaare dipuwaja moadiabeaa.

<sup>11</sup> Dohpaguere yũ acawererã, mũare õadoreaa. Cristore guñaturanemoque. Eropa iirã õarã árĩque. Mũaare yũ wererare õaro peenũruque. Mũa mera majarã mera yujuro mera periũque. Mũa basi õaro mera árĩque. Mũa eropa árĩcũ ãagũ mũa mera Goãmũ árĩgũcumĩ. ãgũ marire game mahicũ iigũ, marire õaro mera árĩcũ iigũ ãhrimi. <sup>12</sup> Eropirã mũa mera majarãre bocatĩrirã erãre õaro mera mojoto ñeaque mũa. <sup>13</sup> Árĩpehrerã õ majarã Goãmũ yarã mũare õadorema.

<sup>14</sup> Mari Opũ Jesucristo mera mũare árĩpehrerãre õadoreaa. Eropigũ Goãmũ ãgũ mahiri mera árĩpehrerã mũare õadoreaa. Eropigũ Espĩritu Santo árĩpehrerã mũa mera õaro ãhrimi. Eropa ta árĩporo. Iripẽta ãhraa.

## **Goãmu Yare Wereripu**

### **Desano: Goãmu Yare Wereripu New Testament**

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 21 Feb 2024 from source files dated 29 Jan 2022

17771afc-c309-57fd-9ff3-2d5a0cd59ff1